

Marzo 2018.



Participantes no obradoiro de radio.

## O ENCONTRO DE ESCOLAS UNESCO ACHEGA AO CAMPUS 130 NENOS E NENAS

**Eduardo Muñiz | Pontevedra**

234 alumnos e alumnas de primaria e secundaria, procedentes de diferentes centros de ensino de Galicia, participan desde a mañá deste xoves en Pontevedra no VII Encontro Galego de Escolas Asociadas á Unesco, unha rede que integra a centros de ensino de diferentes niveis e da que tamén forma parte a Facultade de Ciencias da Educación e do Deporte. [+info](#)



A Universidade reforza os seus lazos co Brasil ao abeiro de 'Lapassion'

## A UNIVERSIDADE REFORZA OS SEUS LAZOS CO BRASIL AO ABEIRO DE 'LAPASSION'.

**Duvi | Pontevedra**

O 21 de febreiro, Vigo convertíase na primeira universidade europea en asinar un memorando, que contempla accións nos ámbitos educativo, científico e tecnolóxico, co Conselho Nacional das Instituições da Rede Federal de Educação Profissional, Científica e Tecnológica do Brasil, Conif, así como unha serie de convenios específicos de colaboración con 25 institutos federais deste país. Entre eles, os de Goiás, Minas Gerais, Maranhao, Amazonas e Sul, que ao longo da xornada do mércores participaron na Casa das Campás nun encontro de traballo do proxecto europeo *Lapassion*, do que Vigo, a través do Campus Crea S2i, é unha das 15 institucións europeas e americanas participantes. Reunión que se viu complementada, á súa vez, por un encontro do reitor, Salustiano Mato, cos representantes destes cinco institutos federais, xunto con Carlos Ramos, vicerreitor do Instituto Politécnico do Porto e coordinador de Lapassion, un proxecto financiado con preto dun millón de euros polo programa Europeo Erasmus+. [+info](#)




*O día a día da mocidade transexual, en primeira persoa*

## O DÍA A DÍA DA MOCIDADE TRANSEXUAL, EN PRIMEIRA PERSOA.

**Eduardo Muñiz | Pontevedra**

"A algo que non coñeces, teslle medo". Con este argumento puña de relevo o mozo transexual Marcos Ceive a importancia de achegar á sociedade á realidade é ás problemáticas que teñen que facer fronte no seu día a día as persoas transexuais, que é o propósito central de *(Trans)formando o mundo*, unha actividade promovida polo Concello de Pontevedra que na mañá deste venres achegouse ata a Facultade de Ciencias da Educación e do Deporte. Alí, Ceive e a escritora Eva Mejuto mantiveron un coloquio co alumnado, no que esta última lles presentou o seu libro *22 segundos*, unha obra que narra en primeira persoa a historia dun mozo transexual e que ten como obxectivo "xerar empatía na mocidade". [+Info](#)

2



*Multitasking Cubes, unha ferramenta para a rehabilitación cognitiva*

## MULTITASKING CUBES, UNHA FERRAMENTA PARA A REHABILITACIÓN COGNITIVA.

**Rosa Tedín | Ourense**

"Unha plataforma web de uso clínico e baseada no método Memodado para a rehabilitación neuropsicolóxica de pacientes mediante a realización de tarefas de estimulación cognitiva de procesos relacionados coa atención e a memoria a través da execución de diferentes tarefas de restitución e/ou compensación". Deste xeito preséntase Multitasking Cubes, unha ferramenta desenvolvida por investigadoras e investigadores do grupo de Sistemas Informáticos de Nova Xeración da Escola Superior de Enxeñaría Informática do campus de Ourense. [+info](#)



*Salustiano Mato, Alfonso Rueda e Alfredo García  
Foto: Xunta*

## XUNTA, UNIVERSIDADE E FEGAMP PRESENTAN UN NOVO PORTAL DE TRANSPARENCIA PARA OS CONCELLOS

**Duvi | Vigo**

O vicepresidente da Xunta, Alfonso Rueda; o presidente da Federación Galega de Municipios e Provincias (Fegamp), Alfredo García, e o reitor da Universidade de Vigo, Salustiano Mato, participaron esta mañá na presentación do Portal de Transparencia dos concellos galegos, unha iniciativa dirixida a facilitarlle á cidadanía información detallada sobre o funcionamento dos consistorios galegos, desde as declaracións de bens dos alcaldes e concelleiros, ata información sobre as subvencións, seguimento das tramitacións en liña, etc. [+info](#)



*O Pergamiño Vindel regresa a casa deixando atrás o fogar*

## O PERGAMIÑO VINDEL REGRESA A CASA DEIXANDO ATRÁS O FOGAR

**M<sup>a</sup> del Carmen Echevarría e M. Del Río | Vigo**

Nas horas previas ao seu regreso á Morgan Library e Museum de Nova York, o Pergamiño Vindel recibiu o adeus dunha ampla representación da sociedade viguesa e galega, que se deu cita esta tarde no Museo do Mar de Galicia, nun acto, no que o presidente da Xunta e o reitor da Universidade de Vigo foron os encargados de verbalizar a despedida á obra de Martin Codax, que os artistas Roi Casal e Uxía interpretaron coas súas voces e a súa música. [+info](#)



*O campus acolleu este martes unha xornada sobre esta cuestión*

## DETRÁS DAS “MANADAS”, A CULTURA DA VIOLACIÓN COMO UN PROBLEMA NORMALIZADO

**Rosa Tedín | Ourense**

“A cultura da violación é un termo empregado para describir unha cultura na que a violación é un problema social e cultural normalizado debido ás actitudes sociais sobre o xénero, a masculinidade e a sexualidade”. Co obxectivo de afondar nesta problemática, a Facultade de Ciencias da Educación do campus de Ourense acolleu este martes a xornada *A cultura da violación na nosa sociedade: a ‘manada’ como caso paradigmático*. Catro expertas de diferentes eidos analizaron a violencia sexual contra a muller exercida “polas manadas” e relacionándoa con elementos como a pornografía, a prostitución e o modelo de masculinidade que impera no patriarcado. [+info](#)



*María del Carmen López, directora do Galicia Open Future de Telefónica, foi a encargada de explicar a iniciativa aos asistentes*

## GALICIA OPEN FUTURE PRESENTA OS SEUS DOUS PRIMEIROS RETOS NO CAMPUS.

**Eduardo Muñiz | Pontevedra**

**Duvi | Ourense**

A Escola de Enxeñaría Informática do campus de Ourense acolleu este martes a presentación do proxecto Galicia Open Future de Telefónica. Retos Industria 4.0. Trátase dunha iniciativa promovida por Telefónica en colaboración coa Xunta de Galicia co obxectivo de apoiar ao sector industrial na súa transición cara unha industria 4.0, lanzando dous primeiros retos de innovación aberta con dúas importantes empresas tractoras como son Finsa e o Grupo Nova Pescanova. Por primeira vez, esta convocatoria está aberta á participación das universidades. [+info](#)



A vicerreitora de Estudantes no stand da Universidade de Vigo na Fiesa atendendo ao alumnado

## A UNIVERSIDADE ACADA UNHA VINTENA DE ACORDOS DE MOBILIDADE CON INSTITUCIÓNS DO CONTINENTE AMERICANO

### Duvi | Vigo

Ata unha vintena de acordos de mobilidade de estudantes e docentes con universidades do continente americano e outras europeas, acadou a Universidade de Vigo durante a celebración da I Feria Internacional de Educación Superior de Argentina, Fiesa 2018, celebrada na cidade de Mendoza e na que España foi o país invitado. A vicerreitora de Estudantes, Dolores González, e a directora técnica da Oficina de Relacións Internacionais da Universidade de Vigo, Amelia Rodríguez, foron as encargadas de dar a coñecer a oferta académica da institución viguesa, así como de participar en conferencias e obradoiros sobre internacionalización e mobilidade con América Latina e sobre política lingüística. [+info](#)

4



Un intre da reunión na sala II do edificio Miralles

## O CAMPUS ACOLLERÁ EN ABRIL UNHA XORNADA DE PROMOCIÓN DE HÁBITOS DE VIDA SAUDABLE COORGANIZADA CO INJUVE<sup>ma</sup> DEL CARMEN ECHEVARRÍA | VIGO

### D. Besadío | Vigo

O campus de Vigo acollerá o vindeiro 17 de abril a primeira xornada organizada en Galicia do Programa Prevent 2018, unha iniciativa posta en marcha polo Injuve, Instituto de la Juventud, en colaboración coas universidades integrantes da Rede de Universidades Saudables –entidade creada en 2008 e da que Vigo forma parte da súa xunta directiva- e as respectivas direccións xerais de Xuventude das comunidades autónomas. O obxectivo é promover hábitos de vida saudables e a saúde cardiovascular da mocidade e facelo a través de diferentes talleres nos que participen técnicos de xuventude, profesionais da saúde e a actividade física e, sobre todo, os propios mozos e mozas e resto de persoas interesadas. [+info](#)



A xornada celebrárase no campus o xoves 15 de marzo. Foto: Ana Rodríguez

## AQUAE TALENT HUB EXPLORARÁ EN OURENSE A CREACIÓN DO UNIVERSO E A EVOLUCIÓN DO PENSAMENTO CIENTÍFICO

### Duvi | Ourense

O campus de Ourense acollerá o xoves 15 de marzo a sétima edición de Aquae Talent Hub, un encontro “para mentes inquietas que queren aprender sobre innovación, compartir coñecementos e ampliar a súa rede de contactos”. A cita contará cunha *master class* a cargo de Pablo Martínez, científico do Instituto Tecnolóxico de Zúrich, e cun taller de Irene Lapuente, experta en comunicación e pedagogía. [+info](#)





A Universidade de Vigo conta cun stand propio neste salón da educación

## A UNIVERSIDADE PROXECTA O SEU POTENCIAL CUNHA MAIOR PRESENZA EN EDUGAL

**Eduardo Muñiz | Pontevedra**

Desde este mércores e ata este venres, prevese que máis de 2000 alumnos e alumnas de centros de ensino de diferentes partes de Galicia se acheguen ata o Pazo da Cultura de Pontevedra, onde se celebra a sétima edición do Salón da Oferta de Educación e Formación de Galicia Edugal, no que a Universidade de Vigo amosa un ano máis o potencial das súas diferentes titulacións, tanto ofrecendo información e asesoramento a mozos e mozas como achegando diferentes exemplos prácticos dos proxectos que se desenvolven nas facultades e escolas. Faino a través dun stand institucional que neste 2017 reúne a maior representación de centros das diferentes edicións, un total de nove, e da participación nas charlas de orientación que se desenvolven en cada xornada. [+Info](#)



As e xornalistas do Duvi, Belén Martín Lucas, Salustiano Mato e Anabel G. Penín

## A UNIVERSIDADE APELA Á LOITA FEMINISTA NO ACTO DE CELEBRACIÓN DO DÍA INTERNACIONAL DAS MULLERES

**Duvi | Vigo**

"Mañá - e cando cumpra- toca sumar forzas, protestar e esixir solucións aos problemas e obstáculos que atopamos día a día de xeito sistemático. Mentres a desigualdade exista, non parará a loita feminista! Vémonos na rúa". Así remata o manifesto ao que tres alumnas de 4º curso do Grao en Linguas Estranxeiras deron lectura este mediodía, no acto institucional, que co gallo do Día Internacional das Mulleres 2018, celebrou a Universidade de Vigo. Coa lectura do texto, no que Irene Martínez, Laura Rodríguez e Iria Seijas denunciaron as discriminacións que as mulleres sofren nos ámbitos académico e laboral, finalizou un acto no as e os xornalistas encargados da redacción do Diario Dixital da Universidade de Vigo, Duvi, recibiron o VI Premio de Compromiso coa Igualdade de Xénero *uviguala 2018* e no que a docente e investigadora do grupo Bifega Belén Martín Lucas ofreceu un relatorio titulado *O carácter neoimperialista da 'guerra conta o terror': achegas dende os feminismos decoloniais*. [+info](#)



Nesta edición do foro 33 empresas contan con stand

## O FORO TECNOLÓGICO DE EMPREGO AGARDA SUPERAR OS 2500 CURRÍCULOS RECOLLIDOS EN 2017

**D. Besadío | Vigo**

É a gran cita anual co emprego do ámbito tecnolóxico, organizado por e para o alumnado das tres enxeñarías do campus: Minas e Enerxía, Industrial e Telecomunicación. Hoxe arrancou no campus a XVIII edición do Foro Tecnológico de Empleo e fíxoo coa expectativa de superar os 2500 currículos recollidos en 2017. Participan medio cento de empresas, 33 delas con stand propio, son unha nutrida mostra das principais firmas do sector, algunhas xa clásicas desta cita (Repsol, R, Aluminios Cortizo, BorgWarner...) e outras que se incorporan este ano (Norvento, EDF Solar, Televés...) atraídas, sobre todo, polo tirón de ter presenza nun foro ao que acoden as novas xeracións de profesionais recién incorporados e incorporadas ou a piques de incorporarse ao sector laboral. [+info](#)



Imaxe da concentración celebrada no campus de Vigo

## A COMUNIDADE UNIVERSITARIA ALZA A VOZ POLOS DEREITOS DAS MULLERES

**Eduardo Muñiz | Pontevedra**

Nun 8 de marzo, Día Internacional das Mulleres, marcado pola convocatoria dunha folga internacional de mulleres e de numerosos paros e actos reivindicativos, profesorado, persoal de administración e servizos e alumnado da Universidade de Vigo quixo tamén alzar a súa voz contra as desigualdades e as diferentes formas de violencia que continúan a sufrir as mulleres. Tanto no campus de Vigo como no de Pontevedra tiveron lugar este mediodía concentracións promovidas por colectivos integrados por diferentes representantes da comunidade universitaria, completados cunha lectura colectiva de sendos manifestos, mentres que en Ourense unha asemblea de estudantes impulsou un peche nocturno na Facultade de Ciencias da Educación, dirixido a preparar a xornada de paros e mobilización deste xoves. [+info](#)

6



## UNHA OLLADA INTERDISCIPLINARIA DO DEPORTE REUNIRÁ 300 PERSOAS EN PONTEVEDRA

**Eduardo Muñiz | Pontevedra**

A educación física e a súa importancia no desenvolvemento físico e emocional da infancia e mocidade ou as novas tendencias de planificación de actividade física destinadas a lograr melloras na saúde son dous dos aspectos a abordar na 14 edición do Congreso Internacional de Ciencias do Deporte e a Saúde, que, entre o 3 e o 5 de maio, prevé reunir preto de 300 persoas no Pazo da Cultura. Promovido pola Vicerreitoría do campus, o Concello de Pontevedra, o Departamento de Didácticas Específicas da Universidade da Coruña e Sportis Formación Deportiva, este evento propón un achegamento interdisciplinario ás ciencias do deporte, que abrangue desde a súa vinculación coa saúde, co ocio e coa didáctica, a aspectos vinculados ao rendemento, xestión ou psicoloxía do deporte.

[+info](#)



Salustiano Mato e Teresa Pedrosa

## UNIVERSIDADE E ZONA FRANCA CREAM A CÁTEDRA ARDÁN PARA CONTRIBUÍR Á CREACIÓN DE RIQUEZA EN GALICIA A TRAVÉS DA INVESTIGACIÓN

**M<sup>a</sup> del Carmen Echevarría | Vigo**

Contribuír á creación de riqueza en Galicia a través do estudo e a investigación da evolución económica e dos distintos factores que determinan a competitividade dos territorios e das empresas, son os obxectivos da Cátedra Ardán. O reitor da Universidade de Vigo e a delegada do Estado na Zona Franca de Vigo asinaron este mediodía o convenio de colaboración entre ambas as institucións, que permite poñer en marcha unha iniciativa que nace cunha vixencia de catro anos, ao longo dos que o consorcio achegará anualmente 60.000 euros e a universidade outros tantos, en concepto de medios materiais, equipos de coñecemento e experiencia investigadora e docente. [+info](#)



*A mostra inclúe diferentes tipos de novelas ilustradas con temática feminista*

## FILOLOXÍA E TRADUCIÓN REIVINDICA CUNHA EXPOSICIÓN A IMPORTANCIA DA MULLER NA BANDA DESEÑADA

**Duvi | Vigo**

Historias de e sobre mulleres. Unhas inventadas e soñadas, outras reais, froito das vivencias e experiencias das súas autoras, de diferentes idades e nacionalidades. Todas elas forman parte da nova exposición organizada polo persoal da biblioteca da Facultade de Filoloxía e Tradución, que despois de ter unha mostra conmemorativa sobre Rosalía de Castro e a súa obra, prosegue a súa homenaxe a mulleres escritoras e artistas cunha recompilación dedicada ás debuxantes e guionistas de bandas deseñadas máis representativas da actualidade. Cómic, tiras cómicas, novelas gráficas e calquera outro tipo de viñetas ilustradas realizadas por mulleres estarán expostas no vestíbulo desta biblioteca. [+info](#)



*Un intre da sinatura deste convenio no Pazo Provincial*

## UNIVERSIDADE E DEPUTACIÓN DE PONTEVEDRA REUNIRÁN ESPECIALISTAS PARA DEFINIR ACCIÓNS CONTRA OS LUMES FORESTAIS

**Eduardo Muñiz | Pontevedra**

Definir unha serie de directrices concretas que sirvan para guiar o traballo de prevención dos lumes forestais e de mitigación das súas posibles consecuencias. Ese é o obxectivo principal do grupo de 15 expertos e expertas de diferentes países que, baixo a coordinación do director da Escola de Enxeñaría Forestal, Juan Picos, traballará nos próximos meses na definición desta serie de medidas, no marco dun proxecto impulsado ao abeiro dun convenio de colaboración de colaboración entre a Universidade de Vigo e a Deputación de Pontevedra, que destina 58.000 euros a este proxecto. [+info](#)



*Salustiano Mato e Martín Gómez asinaron este mércores un convenio marco de colaboración entre as dúas entidades*

## A UNIVERSIDADE DE VIGO E BAHÍA SOFTWARE PORÁN EN MARCHA UNHA CÁTEDRA DE INNOVACIÓN TECNOLÓXICA

**Rosa Tedín | Ourense**

Este mércores Salustiano Mato, reitor da Universidade de Vigo, e Martín Gómez, director de Bahía Software, asinaron un convenio marco de colaboración entre as dúas entidades anunciando xa a que será a primeira acción que se desenvolverá ao seu abeiro, a creación da Cátedra Bahía Software de Innovación Tecnolóxica. O obxectivo da iniciativa, que terá a súa sede na Escola Superior de Enxeñaría Informática do campus, será promover o intercambio de experiencias investigadoras, empresariais e de coñecemento entre a empresa e a institución académica. [+info](#)



# XORNADA

## Falan as publicistas



### MESA REDONDA «As mulleres na industria publicitaria»

- Ruth Davila Segade. Directora executiva en Publigal.
- Marta Espósito Martínez. Desempenhadora estratéxica en ALL.
- Noelia Fernández Estévez. Directora creativa en Densofon.
- Luz Pérez Costas. Directora de contas e marketing dixital en Oso Publicidade.

Luns, 19 de marzo ás 10.00 h  
Salón de Graos da Facultade de  
Ciencias Sociais e da Comunicación  
Campus de Pontevedra

Universidade de Vigo

Facultade de Ciencias  
Sociais e da Comunicación  
Unidade de  
Igualdade

## UNHA XORNADA ANALIZARÁ NO CAMPUS O TEITO DE CRISTAL NA INDUSTRIA PUBLICITARIA

### Eduardo Muñiz | Pontevedra

Segundo os datos de *#MásMujeresCreativas*, unha plataforma integrada por máis de mil profesionais da creatividade no sector publicitario, a pesares de que as mulleres son maioritarias nos estudos universitarios de publicidade en España, nos departamentos creativos das axencias hai un 20% de traballadoras e só o 14% dos directores e directoras creativos e o 1% dos directores e directoras xerais creativos son mulleres. Debater sobre esta situación e sobre as dificultades que as profesionais do sector teñen que afrontar na súa traxectoria é o propósito central de *Falan as publicistas* [+info](#)

8



A Sección de Extensión Universitaria organiza os proxectos de voluntariado propios da Universidade

## A UNIVERSIDADE LANZA DOUS NOVOS PROGRAMAS DE VOLUNTARIADO

### Duvi | Vigo

Dende fai varios anos a Universidade vén desenvolvendo diferentes programas de voluntariado cos que anima á comunidade universitaria a amosar a súa cara máis solidaria. Ás iniciativas máis exitosas, como as organizadas pola Oficina de Medio Ambiente, súmanselle este ano dous novos programas relacionados coa prevención de riscos laborais cos que se buscan persoas dispostas a botar unha man na organización de simulacros de emerxencias na contorna do campus, así como na preparación e actualización de campañas informativas centradas nestas temáticas. [+ info](#)



A cita celebrouse este xoves na piscina do campus

## OS CAMPIONATOS GALEGOS UNIVERSITARIOS DE NATACIÓN CONTARON CON MEDIO CENTENAR DE PARTICIPANTES

### Rosa Tedín | Ourense

A Área de Benestar, Saúde e Deporte da Universidade de Vigo foi a encargada este ano de organizar no campus de Ourense a celebración dos Campionatos Galegos Universitarios de Natación. A cita, que tivo lugar este xoves na piscina do campus de Ourense CDU AQA Ourense, contou coa participación de medio centenar de deportistas federados das tres universidades galegas acompañados por técnicos e técnicas dos seus respectivos servizos de deportes. Por equipos, resultou gañadora a Universidade de Santiago de Compostela. [+ info](#)





O campus acolleu este xoves o arranque da edición deste ano do Aquae Talent Hub

## UNHA PAIXÓN CHAMADA CIENCIA

**Rosa Tedín | Ourense**

Arredor de 300 membros da comunidade universitaria do campus de Ourense asistiron este xoves ao arranque da edición deste ano do Aquae Talent Hub, un evento divulgativo que percorrerá diferentes cidades españolas. A cita, que xurdiu froito da colaboración establecida entre Viaqua, a súa fundación, Fundación Aquae, e a Universidade de Vigo, contou coa intervención de dous físicos, como son Irene Lapuente e Pablo Martínez, que durante catro horas guiaron aos asistentes nunha apaixonante viaxe pola ciencia, concretamente pola física, e por como as súas formas de traballar poden ser de utilidade noutros eidos da vida cotiá. [+ info](#)



Os docentes xordanos mantiveron unha xuntanza co vicerreitor do campus

## BELAS ARTES ESTREITA LAZOS CON XORDANIA

**Eduardo Muñiz | Pontevedra**

A Facultade de Belas Artes é un dos 18 dos centros de ensinanza artísticas superiores de España que integran o consorcio Cartes, unha iniciativa impulsada pola ESAD Antonio Faílde de Ourense que, no marco da acción Erasmus+ Ka107, busca fomentar as relacións e acordos entre os integrantes deste consorcio e organismos de educación superior de diferentes partes do mundo, fóra da Unión Europea. Entre elas Oriente Medio, desde onde esta semana chegaron ao campus tres profesores da Universidade de Xordania, a principal e máis antiga institución de educación superior deste país. "O obxectivo deste programa é poñer en contacto a dúas institucións co propósito de iniciar conversas", salienta o vicedecano de Relacións Internacionais, Carlos Tejo, da que é a "primeira aproximación da facultade a unha universidade de Oriente Medio". [+ info](#)

## OS PROXECTOS GÑADORES DOS PREMIOS INCUVI-AVANZA RECIBIRÁN ESTE ANO UNHA AXUDA ECONÓMICA DE ATA 3000 EUROS.

**D. Besadío | Vigo**

Os proxectos gañadores dos premios Incubi-Avanza recibirán este ano unha axuda económica de ata 3000 euros e o asesoramento dun equipo de profesionais que mentorizarán os proxectos durante o ano que estean nos espazos do Parque Empresarial de Porto do Molle ou nas instalacións do CITI de Ourense. Son as principais novidades da terceira convocatoria duns galardóns que naceron como resposta á necesidade dos participantes de Incubi-Emprende de contar cun programa propio que ofrece continuidade aos seus proxectos e que agora se consolida e reforza como apoio para aqueles proxectos empresariais máis viables e con máis potencialidade. [+ info](#)





Este venres inaugurouse no campus unha mostra do artista Jesús Otero-Yglesias curada por Monse Cea. Na imaxe con Xosé Manuel Buxán

## 'PUNTAIS E POESÍA PARA "SER UN LUGAR" EN ALTERARTE

**Rosa Tedín | Ourense**

Este venres arrancou na Sala Alterarte do campus de Ourense unha nova edición, a cuarta, de *Estado Crítico. 12 Curador\*s 12 Artistas*, que guiará a programación deste espazo expositivo durante os vindeiros meses. A intervención *Ser un lugar*, do artista lucense Jesús Otero-Yglesias e curada por Monse Cea, é a mostra escollida para abrir esta nova etapa en Alterarte. A través de puntais e de poesía de Carlos Oroza, o creador rompe o espazo e xoga co tempo para trasladar aos visitantes a un lugar discursivo propio. [+ Info](#).

10



Davila, Fernández, Pérez e Expósito, durante o debate

## OS ESTEREOTIPOS DE XÉNERO SEGUEN LASTRANDO AS TRAXECTORIAS DAS MULLERES NO SECTOR PUBLICITARIO

**Eduardo Muñiz | Pontevedra**

A existencia de estereotipos de xénero que manteñen viva a idea de que o traballo creativo "é cousa de homes", as dificultades en materia de conciliación familiar, sumadas aos roles polos que as tarefas de coidado "suponse que deben recaer exclusivamente nas mulleres" ou unha "deficiente cultura empresarial na que non se valora o talento". Estes foron tres dos argumentos achegados ao debate respecto do teito de cristal na industria publicitaria que este luns protagonizaron catro ex-alumnas e profesionais do sector na Facultade de Ciencias Sociais e da Comunicación, no marco de *Falan as publicistas*, unha xornada promovida polo profesor Alberto Dafonte. [+Info](#)

## PREMIOS 2018 de poesía, relato curto e tradución literaria



## A ANL LANZA UNHA NOVA CONVOCATORIA DOS PREMIOS DE POESÍA, RELATO CURTO E TRADUCCIÓN

**Duvi | Vigo**

A Área de Normalización Lingüística lanzou este mes unha nova edición dos Premios de poesía, relato curto e tradución, un certame que atesoura 21 anos de traballo a prol da literatura galega e que supón unha das citas máis importantes do calendario académico co mundo das letras. Diferentes autoras e autores con relevancia hoxe no ámbito literario galego pasaron por estes premios e, como cada ano, volverase contar coa implicación e colaboración da Secretaría Xeral de Política Lingüística da Xunta de Galicia e da editorial Xerais, que será a encargada de publicar un libro cos traballos gañadores. [+Info](#)



O campus de Ourense sumouse este martes á conmemoración do día da escritora galega

## ROSALÍA DE CASTRO COMO REIVINDICACIÓN DA LINGUA, A CULTURA, A MULLER E A LIBERDADE DE EXPRESIÓN

**Rosa Tedín | Ourense**

“Nun mundo de fiestras pechadas, buscamos o refacho de vento que abra de vez”. Con estas palabras de María Reimóndez comeza o manifesto *AbrideAFiesta* feito desde a Asociación de Escritoras e Escritores en Lingua Galega co gallo da conmemoración o 24 de febreiro do Día de Rosalía de Castro. Uníndose a esta celebración por segundo ano consecutivo, o campus de Ourense acolleu este martes unha xornada na que, alén da lectura deste manifesto, se desenvolveu unha ampla programación na que o alumnado foi o gran protagonista e na que se empregou a figura da escritora galega como unha fiestra desde a que reivindicar “en tempos convulsos” a lingua e a cultura galegas, a muller e a liberdade de expresión e pensamento. [+ Info](#)

11



Difunde os labores de adestramento que se levan a cabo para loitar contra a contaminación mariña accidental

## ‘UN NOVO VÍDEO DE DIVULGARE DEFENDE A NECESIDADE DE IMPLEMENTAR PROTOCOLOS PARA COMBATER VERTIDOS QUÍMICOS NO MAR

**Duvi | Vigo**

O grupo Divulgare leva dous anos involucrado no proxecto *Mariner* (Enhancing HNS preparedness through training and exercising), coordinado polo Cetmar, que ten como obxectivo mellorar a capacidade de resposta ante vertidos químicos mediante o desenvolvemento de plans de adestramento e resposta coordinados entre distintas rexións da Europa atlántica, como Reino Unido, Francia, España e Portugal. [+ Info](#)

## UN ÍNDICE MATEMÁTICO PERMITE PREDICIR PROBLEMAS NA COMBUSTIÓN DA BIOMASA

**Eduardo Muñiz | Pontevedra**

Un dos problemas que implica o aproveitamento enerxético da biomasa atópase na cantidade de cinzas que xera a súa combustión e en como estas poden provocar problemas como a xeración de escouras nas caldeiras, ao que se suma a presenza nas mesmas de compostos químicos como a sílice, o potasio ou o sodio que baixan a temperatura de fusión da biomasa, provocando un descenso na eficiencia e danos nestes equipamentos. Non obstante, “a día de hoxe non existe unha ferramenta que nos achegue información da calidade, risco de formación de escouras e perigo de fusibilidade para os biocombustíbeis sólidos”, sinala o investigador Juan Luis Rodríguez Somoza, quen, no marco da súa tese de doutoramento, definiu xunto ao responsable do Laboratorio de Enerxías Xiloxeradas da Escola de Enxeñaría Forestal, Luis Ortiz, un índice matemático capaz de predicir o risco de formación de “sinterizados”, da xeración de escouras nas grellas das nas caldeiras, dos diferentes tipos de biomasa. [+Info](#)



Deseñado no laboratorio de enerxías xiloxeradas da EE Forestal, dentro da tese de Juan Luis Rodríguez Somoza





Un intre da reunión do reitor coa delegación brasileira

## DOCENTES DA ÁREA DE EFICIENCIA ENERXÉTICA E FONTES RENOVABLES DO INSTITUTO FEDERAL DE GOIÁS VISITAN O CAMPUS

**Duvi | Vigo**

Seis docentes da área de eficiencia enerxética e fontes renovables do Instituto Federal de Goiás (IFG) visitan este martes o campus de Vigo, onde mantiveron unha entrevista co reitor Salustiano Mato e coñecerán algúns laboratorios da Escola de Enxeñería Industrial, onde serán recibidos polo catedrático José Cidrás e o director do Departamento de Enxeñería Eléctrica, Carlos Garrido. Marcelo Escobar de Oliveira, Ghunter Paulo Viajante, Luis Gustavo Wesz da Silva e Eric Nery Chaves, son os docentes do campus Itumbiara do IFG, que integran a delegación brasileira que hoxe visitou o campus de Vigo e que completan José Luis Domingos e Elder Geraldo Dominguez do campus Goiânia. [+Info](#)

12



Foto de familia das e dos participantes na xornada

## XURISTAS DE RECOÑECIDO PRESTIXIO DEBATEN NO CAMPUS SOBRE A IMAXE DA MULLER NA PUBLICIDADE.

**D. Besadío | Vigo**

O alumnado da Facultade de Ciencias Xurídicas e do Traballo tivo este martes unha clase diferente, cando menos o que participou na xornada *A imaxe da muller na publicidade comercial*, unha actividade organizada pola Área de Dereito Mercantil en colaboración coa Unidade de Igualdade. Exerceron como docentes tres xuristas de recoñecido prestixio –Carlos Lema, Amanda Cohen e Christian Herrera– que afondaron nos criterios que acostuman aplicar para determinar se a aparición da imaxe da muller na publicidade é lícita ou non, así como nos diferentes mecanismos que a sociedade ten á súa disposición para reclamar ante unha publicidade ilícita por atentar contra a dignidade da muller e como debe facerse para fundamentar a reclamación. [+Info](#)



O campus acollerá o 12 de abril un encontro pedagóxico centrado nesta cuestión. Imaxe: CDR O Viso, Lodoselo

## O QUE O ENSINO PODE FACER POLO DESENVOLVEMENTO DO RURAL

**Rosa Tedín | Ourense**

Por segundo ano consecutivo, a Facultade de Ciencias da Educación do campus de Ourense organizará xunto ao CIFP Portovello un encontro pedagóxico que nesta ocasión estará dedicado á educación no rural. A cita, que terá lugar o 12 de abril nas instalacións universitarias, xuntará a alumnado dun e doutro centro para estreitar lazos, para intercambiar perspectivas e sobre todo para que coñezan a realidade e experiencias de éxito de desenvolvemento educativo no rural. [+Info](#)



O proxecto de catalogación permite identificar ás especies arbóreas máis significativas do campus

## O CAMPUS PON EN VALOR AS SÚAS 400 ÁRBORES NO DÍA MUNDIAL DOS BOSQUES

**Eduardo Muñiz | Pontevedra**

Ao longo das preto de sete hectáreas que comprende o campus da Xunqueira poden atoparse preto de 400 árbores, entre as que figuran grandes exemplares de *Platanus hispanica* e de *Cedrus deodara*, o cedro do Himalaia, así como un grupo de moreiras, *Morus alba*. Árbores que, nunha iniciativa impulsada pola Vicerreitoría, a Escola de Enxeñaría Forestal e a Oficina de Medio Ambiente (OMA) da Universidade, coa colaboración do Servizo de Xardinería, o campus busca poñer en valor a través dun proxecto de catalogación, presentado este 21 de marzo ás portas da EE Forestal, con motivo da conmemoración do Día Mundial dos Bosques. [+Info](#)

13




Jugatx Astorkia, Irina Alegre e Paula Jaraices

## LUZ, ROSTROS E FOGAR CONFLÚEN NUNHA EXPOSICIÓN NA CASA DAS CAMPÁS

**Eduardo Muñiz | Pontevedra**

Tres alumnas do máster en Arte Contemporánea. Creación e Investigación, procedentes de diferentes puntos de España e tres xeitos de abordar a creación artística desde diferentes disciplinas e temáticas conflúen en *Indeble*, a exposición que ata o 2 de abril pode visitarse na Casa das Campás. A estremeña Irina Alegre, a biscaíña Jugatx Astorkia e a valenciana Paula Jaraices reúnen unha serie de traballos escultóricos, pictóricos e fotográficos nunha exposición que serve como exemplo de tres liñas de traballo artístico que abordan cuestións como a dor e o sentimento reflectido nos rostros, o papel determinante que xoga a luz na creación ou negación da imaxe e a relación entre o suxeito e o espazo, reflectida a través da idea do íntimo e do fogar. [+Info](#)



Dous dos participantes neste taller, durante unha das sesións de traballo. Foto: Aldeas Infantiles

## MENORES EN RISCO DE EXCLUSIÓN EXPLORAN A SÚA CREATIVIDADE COA ANIMACIÓN

**Eduardo Muñiz | Pontevedra**

“Penso que a educación artística está demasiado esquecida e este é o meu gran de area para cambiar a situación”, salienta Eva Antelo, estudante do grao en Belas Artes e responsable do taller sobre animación que nestas semanas desenvolve con cinco menores en risco de exclusión social no Centro de Atención de Día de Aldeas Infantiles en Vigo. A actividade, que se insire no programa de voluntariado que a facultade mantén con esta organización de axuda á infancia, ten como propósito que nenos e nenas poidan desenvolver o seu potencial creativo e artístico, expresar as súas emocións e mellorar a súa autoestima. [+Info](#)

## O ALUMNADO DO PROGRAMA DE MAIORES DÉIXASE CATIVAR POLOS MISTERIOS DO ANTIGO EXIPTO

### Duvi | Vigo

A cultura do val do Nilo, chea de misterios, sempre chamou a atención de todos os públicos e semella que o fai especialmente do alumnado do Programa de Maiores da Universidade de Vigo que, un curso máis, copou as prazas do obradoiro de Extensión Universitaria *Introdución á Cultura Exipcia II: Cultura, Arte e Literatura* que se imparte na Escola de Estudos Empresariais e que vai xa pola súa terceira edición en Vigo. [+Info](#)

14



Un intre da xornada formativa que tivo lugar no Porto de Marín

## ARRANCA A FORMACIÓN DOS PESCADORES QUE COLABORAN NO PROXECTO REPESCA\_PLAS

### Duvi | Vigo

Recoller lixo mariño en Galicia e Valencia para analízalo e valorizalo en forma de novos produtos. Este é o obxectivo co que este ano se puxo en marcha o proxecto Repesca\_Plas, unha iniciativa impulsada polo Instituto Tecnolóxico do Plástico (Aimplas) coa colaboración, entre outras entidades, do grupo Ecotox da Universidade de Vigo. Definidos e planificados os puntos de recollida a pé de porto para a súa posterior caracterización, esta semana arrancou no Porto de Marín a formación dos pescadores para que estes labores se realicen de forma óptima. [+Info.](#)



---

UNIVERSIDADE DE VIGO

**Unidade de Análisis e Programas.**

Anexo a xerencia.

Planta Baixa.

36310 Vigo (Pontevedra)

986.818.689 986.818.640